



17508

I Maa. St. Dr.

P

Princeps.

Cardinalis

Babecki Andreae. Oratio funebris.

PANEG. et VITAE

Poibou. 4.

N^o. 342.

Biblioteka Jagiellońska



stdr0005471

ORATIO
FVNEBRIS,

Quam

In supremo & luctuoso officio

Serenissimi Domini

D. IOANNIS ALBERTI,

POLONIÆ, & SVECIÆ

PRINCIPIS,

S. R. E.

CARDINALIS,

eminentissimi,

EPISCOPI CRACOVIE:

Ducis Seueriensis.

Pompæ Sepulchrali,

Nobilis ANDREAS BABECKY, Eloquentiæ &

Philosophiæ in Academia Cracoviens. Studiosus,

cum debita animi submissione

obtulit.

BIBLIOTHECA
JAGELLONICA



175081
*Hic ubi concordēs veniunt in cornua lūnæ
Lato hilarant faustam lumine Sarmatiam,
Sarmatiae ex istis nascuntur lumina lunis,
Deq; crucis Sacro flumine potat ager.
Stemmata Szyscouium priscæ pietatis honorem
Et Martis studium, quod tueantur habent.*

Christophorus Skotnicki,
Stud: Poet:

Perilluſtri & Reuerendiſſimo Domino,
D. ANDREÆ SZY SKOWSKI,
Sholaſtico Cracouiē. Archidia-
cono Zabichoyceſ. Præpoſito Iſzeſ.
Cantori Ploceſ. S. R. M.

S E C R E T A R I O.

Domino & Patrono Obſervantiſſimo,

Salutem & perennem Felicitatem.



*Acerbiſſima & maximè luſtuofa morte in ipſo ve-
luti ſtadio curſuq; rerum humanarum extinctum
Sereniſſimum Principem, cancellis placuit angu-
ſti ingenij circumſcribere; tantiq; caſus commiſe-
ratione percuſam Rempublicam, ſub inclyto no-
mine tuo, Perilluſtris & Reuerendiſſ. Domine
qui vetus Regia domus cultor es, in ſinum lugentis
totius Europæ effundere. Nam ſi interitu acerbiffimo Principum me-
rent Imperia, ſqualent Regna, Roma conſiſtatur, maximè Sacra lu-
get Religio, omni veteri hilaritate exuta, omni ſplendore ſpoliata Sedes,
& domicilia Chriſtianorum in ſqualore iacent: quis noſtrum ſine ſin-
gultibus, & crebris ſuſpiriis officium maroris plenum, Sereniſſ. & E-
minentiff. Cardinali perſoluct? qui ad maxima quæq; natus & inſtitu-
tus, ut adhuc vernans omnium in ſe ſtudia & animos erexit: ita ino-
pinato euentu à nobis diſtractus Rempublicam Polonam magnopere ſau-
ciam afflictamq; reddidit. O ſpes hominum fragiles, & incertas, ò
lubricam & præcipientem felicitatis humana conuerſionem, ò falſam expe-
ctationem, & crudelitatem fati ſine delectu furentis. Quanta dementia
hominum ſpes longas inhoancium, quàm ſtultum eſt ætatem polliceri,*

cui si callum apponas, in omni aetate senectus est, & fato obnoxia omnis aetas. ille flos Quirinalis Capitolij in ipso aetatis flore delibutus tam subito emarcuit? quem ad aeternitatem omnibus votis promouebamus; iniurioso mortis impetu extinctus? ille animi vigor praeter vota nostra excessit? in cuius purissimo animo altissimum quasi domicilium virtutes extruxisse videbantur: ita ut facile uniuersos, tum admirabili virtutum laude, tum diuina prorsus rerum gerendarum gloria quam longissime antecelleret, nisi fatalis violentia tam subito regia virtute conspicuum Principem Sarmatico Orbi eripuisset. Huius igitur Serenissimi Principis Regias illas dotes, quibus admirationi fuit toti Sarmatico Orbi, imò toti Europa, in solatium afflictæ Patriæ Nomini Tuo Perillustri & Reueren. Domine voueo. Certus sum me tenui incultæq; oratiuncula concredidisse heroicas ac propè diuinas virtutes Serenissimi Principis, cuius Augusti animi æterna indoles breui elogio nec includi, nec facile exprimi potest. Iusta annalium monimenta & pregrandia volumina Virtutes eius comprehendunt. Nec tamen ideo concido animo: habet quippè & semper habuit hoc Animus Tuus Generosus, & benè eruditus Perillustri & Reuerendissime Domine, quod conscius quanto cum labore proficere detur mortalibus parua placidè accipiat, errata humanitus illapsa flectat in partem benigniorem. Quapropter & hunc debilem ingenij mei fatum, in honorem Eius fac Tuum, Tuae authoritatis praesidio fove, quem Ego Tuae voluntatis fiducia fretus, audeo facere publica lucis. Deus Opt: Max: Perillustrem & Reuerendiss. D. V. Ecclesiae, Reipub. Academiae, & in augmentum bonarum literarum diutissime incolumem seruet. Dat. Craconia è Minori Collegio in Museo Excellent. Domini M. Danielis Otręboſſ Collegæ minor. Anno Domini 1635. Mense Aprili Die.

Perillustriſs. & Reuerendiſs. D. V.

Cliens & Seruitor paratiſſimus.

Andreas Babecki.

Oratio Funebris.



Prandum fuit Equites Nobilissimi, vt Serenissimo ac Eminentissimo Ioanne Alberto Poloniae & Sueciae Principe S. R. E. Cardinali Eminentissimo, Episcopo Cracouien. Duce Seruerien. viuo potius frueremur; quàm mortuo in gemitum, in lachrymas, à lachrymis in officium luctuosum, erumperemus. Nam virtus illius summo ornamentorum cumulo referta, vt immortalis esset, res nostræ: vt perpetuò in omnes Ecclesiae partes excubaret, Polonia flagitabat. Verùm quia humanæ vitæ cursus, & ita est varius, vt dirigi nostro artificio non possit: & ita vehemens, vt antequam annos speremus, & vota extendamus miseri, vt senectute ornemur, è conspectu euolet: lachrymas quidem orbitati nostræ debemus: Serenissimo Principi, ob immortalitatem nouo vitæ exordio adeptam, æternam prædicationem. Mors quidem eius, hisce temporibus ob summam rerum domesticarum difficultatem, acerba nobis extitit: eademq; necessitatem attulit obduetarum aliqua ex parte cicatricum, quas fugit ac reformidat animus, diei præsentis acerbitate refricandarum: at illi propter eximia virtutum merita salutaris. Luctum ille nobis è viuis immaturo discessu, at sibi peperit voluptatem. Siquidem ob

præclara Episcopatus sui monumenta ita superstes ad-
huc, & in mortalium animis, & in concilio viuit im-
mortalium, vt ex hac funeris Pompa, velut ex aroma-
tum sylua, non tam mortalitatis, quàm diuinita-
tis odores efflari videantur. De his igitur Serenissimi
& Eminentissimi Cardinalis nostri virtutibus, quæ ve-
luti sydera pulcherrimo radiorum splendore per hunc
orbem Reipublicæ disseminata collucet, dicere dum
gestio; mirari satis non possum, quantum publicus lu-
gentis Sarmatiæ, tanquam viduæ squalor, Senatorum
pullæ vestes, Nobilium mæror, lugubres cantus, se-
pulchrales faces, atrati parietes, atq; aræ, aciem mihi
oculorum obturbent, dicentem retardent, acclaman-
tem frangant, pectus effodiant perorantis: & faustæ
quantum acclamationis ac lætitiæ, rerum gestarum
gloria, & æternitatis lux, quâ nunc, vt piè sperandum
est, ille perfruitur, exigunt: tantum hæc mæsta totius
Poloniæ forma, præsens spectaculum, & ad omnem
sensum doloris concitandum, & ad lachrymas elicien-
das conformatum, oratorem angunt. Verum in hoc
lugubri & Serenissimi Cardinalis nostri interitu, &
gravi patriæ casu, me ipse redarguo, & animum, qui sub-
inde recurrit ad funus, ad panegyricum reuoco, vt
non tam lamentationi, quàm laudationi deseruiat.
Habêt hoc ab arte nonnunquam lutei parietes, vt indu-
cti tectorio, varijsque picturis collustrati fulgeant, &
quod à natura denegatum est nitoris, & gratiæ, hoc ar-
tis operâ consequantur. At verò Nobiles marmoris
crustæ, quas suis ipsa coloribus, & ornamentis natura
rerum

rerum parens decorauit, proprijs enitescunt opibus, nec
ingenitam pulchritudinem, falso quodam gloriæ simu-
lacro mentiuntur. Ita Serenissimi Principis nostri Vir-
tus, in tam illustri loco, in tam nobili præclarissimorum
ingeniorum monumento condita est, atq; collocata, vt
ipsa se suis diuitijs ostendet, & oratorum potius obruat
industriam, quàm ab oratione mutuetur aliquid nouæ
commendationis. Quæ enim in omni genere excellens
atque præstans virtus est, quæ in Serenissimo non repe-
rretur? quod honestatis atq; dignitatis lumen, quod in
eo non eluceret, & resplenderet? Genus requiris? Illu-
stris generis prosapia supra fortunam, omni ætati, Tem-
pori, posteritati ad miraculum proposita, atque eiusmodi,
quæ vt nullius orationis lumen atq; ornatum deside-
rat; ita à nemine etiam maximis eloquentiæ viribus in-
structo, pro dignitate enarrari potest. Quis enim adeò
rerum omnium imperitus est, qui de Maiorum Eminen-
tissimi Nostri Cardinalis gloria, atque rebus gestis non
audiuerit? quæ tellus tam remota, atq; longinqua est,
quæ gens tam fera & barbara, quò non eorum celebris
fama atque præstans gloria peruaferit, penetrauerit? quæ
denique dignitatis, & honoris plenissima nomina, quæ
sagi, & togæ decora & insignia, quæ in familia lagello-
num clarissima non reperiantur? Legantur annales,
euoluantur historiæ, percurrantur rerum memorabili-
um exempla: inspiciantur marmora, signa, tabulæ, pi-
cturæ: omnia plena lagellorum, materni sanguinis cla-
rissimorum Principum plena omnia. Quam sæpè con-
tra immanissimos hostes, multitudine innumerabiles,
atque

atque omni genere copiarum instructos exercitum duxê-
re, signa contulêre, victoriam cum insigni gloria repor-
tarunt? quàm acriter eorum crudelissimos impetus re-
tuderunt, audaciam fregêre, vires attriuêre, castris e-
xutos fugarunt, fuderunt, trucidarunt? quoties ipsi in
confertissimos cuneos, ac mediam belliflammam alacri
animo irruerunt, corporum suorum obiectu hostibus i-
ter intercluserunt, ac præsentis vitæ periculo communia
omnium pericula propulsarunt? Testes sunt victoriæ
elogio politæ literaturæ ad fastigium educæ, Europæi
orbis in oculis ipsoque in lumine, & in sole totius mun-
di ita constitutæ, vt Aquilam Sarmatiæ, tot facibus ve-
luti syderibus circumcinctam, aut gemmis intextam,
aut carbunculis, & flammante segmento distinctam, huc
usque potentissimi Christiani orbis Principes admirati,
Virtutis Regiæ domicilium, arcem fortitudinis, huma-
nitatis sedem, aram clementiæ, mansuetudinis Sacrari-
um, verbo vno victoriarum, & triumphorum thesau-
rum Familiam Iagellonum appellarunt. Nec frustra.
habet enim in amplissimo cæli Sarmatici theatro, im-
pressus Zodiacus, stellas, faces splendoris Iagellonici,
illos Vladislaos, Gethico, Tartarico, Othomanico,
Moschouitico, sceptro formidabiles; Sigismundos,
Augustos, æternis cedris, laureisque immortalibus de-
coratos; qui finitimarum nationum, & Regnorum
Boëmæ, Hungariæ, Germaniæ, Hispaniæ amores de-
meriti, generoso ausu, hostium prope innumerabilium
victores, in cælestem stationem sunt transcripti. Ha-
bet Casmiros admirandarum rerum cum dignitate au-
ctores

res, quorum vel heroicis virtutibus, vel castimoniam Angelicam Empyream familiae possessio, de manu in manum est tradita. Istis luminibus non minus ad ipsius generis pulchritudinem, quam ad virtutis propriae commendationem efflorescentibus, nouus Sol Serenissimus & Eminentissimus Cardinalis adscriptus, quoties amplissima Regni decora, & Ordinis Senatorij, lucidissimas lampades contemplabatur, quoties felices victoriarum progressus, monumentorum Iagellonicae virtutis numerabat, quoties Augusti parentis legebat fortunato passu Augusta proles, vestigia, Palmas intuebatur, laureas distinguebat, argumenta victoriarum scrutabatur, toties accessione noui, & recentis splendoris ad immortalē gloriam, & honorem amplissimo Poloniae Regno exardescerebat; ad instar sedulae apes ex diuersis florum generibus mella libans; quae e pectore eius veluti à Nilo aurifero in totum Europaeum orbem restagnantia, eas beneficiorum copias asportarent, quibus & honorem, & dignitatem, & maiestatem Sarmatico Orbi conciliaret, & Iliadem malorum à patrijs focis fornatus Praesul auerteret. Propositis ijs omnibus, quae ad natalium splendorem pertinent, tamque augustam progenie dignissimam; illisque felicissimis, quas postea euentus comprobauit parentum praedictionibus; ad illa accedo quae maiora, quaeque mirabilia sunt, nec facile in vniuscuiusque cadunt cognitionem, modesta nimirum illa, simulque liberalis ab ipsa pueritia educatio; quam à prudentissimis Parentibus Regni Poloniae gubernatoribus institutus fuit. Nam praeter virtutes Iagellonicae Domui haereditarias,

quas perpetuo , sanctissimè castissimèque colendas ei
præscripserunt , ac commendârunt ; ita in cæteris se ges-
sit Ser. Prin. vt nullus in eo alendo superfluus sumptus, lû-
xus nullus, sed summa in victu, amictu, habitu, incessu,
moderatio appareret : vt facîle dicas, eum non in regali,
sed in priuati alicuius domo natum alitumque fuisse.
Nôrant quippè Sanctissimi Parentes, talia iacienda nobis
iuuenili ætate fundamenta, quale ædificium maturiore
ætate excitare, & erigere velimus. Quid enim per De-
um Immortalem eum facturum credis, qui ab ineunte
ætate, quotidianis commestationibus, sumptuosis epu-
lis indulgens, qui magis cupedijs, luxui, tripudijs, quàm
occupationibus quibusque honestissimis assuetus, tan-
quam alter Sardanapalus, ad imperium accesserit? ia-
ctabit se mihi crede, illius intemperantiâ insolentiùs,
quoque maiorem potestatem acquisuerit, eò se magis
in omne scelus ac flagitium effundet. Si enim voluptas
in hominibus abiectæ sortis suum exerit virus, profectò
multò magis illis dominabitur, qui in summis rerum fa-
stigijs, & dignitatibus sunt collocati: ita vt qui eum fomi-
tem summâ prudentiâ extinguere nescierit, hominem
non secus ac Libicum mare Nothus, ac Boreas exagitabit.
Hæc ante necessitatis fatorumque inclementiam par ma-
gnis Theodosijs, par religiosissimis Constantinis S I G I S-
M V N D V S Tertius cùm præuideret, ita Serenissi-
mum Principem nostrum, ijs artibus, quibus ad huma-
nitatem prima ætas informari solet, instructum & imbu-
tum esse voluit, vt deinceps virtutis arduum ac difficile
iter ingressus, nihil aliud in vita expetendum iudicaret,
nisi

nisi quod amplissimo Poloniæ Regno immortalem gloriam, nobilissimi splendoris incrementa, recentia virtutum emblemata Iagellonicæ Domui, & lucidissimo Austriacæ familiæ Zodiaco, innumeris propè distincto luminaribus, attulisset. Quo posito sanctissimeque iactō fundamento, quid non bonorum iam tunc omnes sperare poterant, cū Serenissimum & Eminentissimum Ioannem Albertum, Augustissimorum Imperatorum, Regum, & Principum, Nepotem, Pronepotem, Abnepotem, occultis quasi cuniculis, ad ampliores ferri virtutes animaduernerent? Ac quemadmodum fontes, qui postquam se per riuulos aliquantisper exonerantes longius à capite profluxerunt, primū in alueos, successu verò temporis, in vastissima quandoque flumina excrefcunt; ita planè tanta illa virtus, Ser. Prin. nouis ardoribus ad immortalem gloriam nominis augusti continuandam inflammata, maius iam theatrum in quo excurreret requirebat. Qui res gentium consuetudinesque variarum varias literis suis incidunt, ac posteritati transmittunt, narrant de Persarum olim Dominis, qui vt sese beneficos posteritati commendarent, clementia, & adumbrata effigie pingi fingique voluerunt. Sublimi & Regio in throno, nunc pedibus sphæras cælestes, veluti polo superiores conculcabant, nunc radiato Capite, inque turbinem complicato, sole veluti taniā redimiti, prodibant; nunc impositis sibi cornibus effæminabantur in lunam, nunc varias formas syderum, puerili ambitione dicam, potius an insania, desumebant. Ridenda barbara hæc, & ad fucatum splendorem excogitata industria. Non ea

synceri purique luminis est conditio, ut aliquis adstantibus sceptrigeris administris, in nouas formas & species sese induat, intus lethali criminum vulnere fauciam mentem habens. Non se vitiorum nocte permittit infuscaris; admittit impuram scelerum, barbara lux, caliginem. Non menstruo interpolatur obscuro; vicario ardore infidum lumen Persicum, multiplicibus laborat defectibus. Non desultoriâ luce irradiat, & erratica; quid tandem æquabile & constans adulterinæ virtuti adiunctum intelleges, quæ nomina tantum beatæ probitatis obtinuit, solido fructu, perfectæ, & consumatæ felicitatis destituta. Altiora est veritatis splendore Sereniss. Princip: Nostri Maiestatis lux nobis lætitiæ proponit argumenta. Et enim si aliquis ex Principibus Persarum enituit in bello, obsoleuit idem in pace, alium toga, sed non arma honestârunt; reuerentiam ille terrore, alius amorem humanitate captauit, ille quæsitam domi gloriam in publico, hic in publico domi partem perdidit; postremo nemo adhuc extitit, cuius virtutes nullo vitiorum confinio læderentur. At Principi nostro, quanta concordia, quantusque concentus omnium virtutum, omnisque gloriæ contigit, vos ego appello Senatores, qualia iudicia publicè in comitijs de hoc vitâ Sancto Principe faciebatis; quam causam potissimum firmissimam vobis in eo inaugurando statuebatis, quantâ votorum concordia Eum Episcopatu Cracouiensi præficere voluistis? Quid aliud spectastis, vidistis, intellexistis, quam speciem illam & imaginem virtutum non fucatam aut adumbratam, sed veram & expressam, dignam, quam non modò nos, quibus

bus præfuit, sed etiam exteri omnes admirarentur? In qua quidem virtutis specie, qualem se ille præstiterit, testis temporum, & nuncia veritatis, referet rerum gestarum series; Sanctorum præsentis æræ, quæ lugere simul & mæneri vnâ nobiscum videntur, vosque omnes Diui, qui sempiternum æuum in Cælo viuitis, quorum sacros cineres hæ ipsæ æræ complectuntur, Tuque imprimis Patrone Regni nostri Stanislæe, pietatis, & religionis Sanctissimi Præsulis nostri in diuinissimum Numen exhibitæ testis esse potes. Nimirum qui eum sæpe casta mente, & pura conscientia pro pace, & conseruatione Reipublicæ nostræ apud DEVM exorantem sensisti, salutaribusque tuis auxilijs apud cæleste numen supplicantem adiuuisti. Stupenda sanè & admiranda pietatis exempla, præsertim verò, quod in tanta felicitate, & maiestate eò pietatis progressus fuerit; vt abiectis & postpositis ijs omnibus illecebris, & voluptatibus, quæ plerosque in tanto rerum fastigio collocatos allicere solent, nihil prius in votis habuit, quàm rerum diuinarum contemplationi vacare. Atque cum à maioribus accepta gloria, & dignitas tribus potissimum rebus conseruetur, & illustrior efficiatur: Religionis ac pietatis sanctissimo cultu: sapientiâ atque eruditione excellenti: armorum tractatione, ac rei militaris industriâ: hæc postrema vera & solida Regum ornamenta, vt Fratri primogenito, Viro fortissimo, & ad omnia magna nato reliquit Eminen. Præsul, ita in illis prioribus, omnes curas, cogitationes, vigilias, atque labores consumpsit. Et cum Serenissimus R E X V L A D I S A V S prior donis, maior

Imperio, bellicæ laudis auidus, totum vitæ suæ spatium
cò direxisset, vt immortales, omniq̃ue posteritatis me-
moriâ indelebiles laureas ex immanissimis Patriæ hosti-
bus reportaret; Eminen. & Sereniss. Cardinalis in pro-
mouendo ac augendo Dei honore constâter conquieuit,
ad eumq̃ue tanquam ad Helicen & Cynosuram totius
vitæ cursum direxit. Serenissimus R E X V L A D I-
S L A V S, vt cõcussam Patriæ pacem, ad felicitatem
optatam reduceret, patriæ hostes fugare, terrorem re-
morari Asiaticum, furores Scythicos reprimere, inso-
lentiam Moschi, omnemq̃ue eius procellam, in Poloniae
exitium irruentem, hinc consilio prudenti, illinc obiectu
fortissimi militis arcere, & ad calamitatem Fidei Ca-
tholicæ instructas cohortes propulsare consuevit; Sere-
nissimus & Eminentissimus Cardinalis spiritualibus
induus armis, hostem non vnus vrbs, sed totius Or-
bis terrarum, animarum Deo dicatarum archipyratam
laceffere non reformidabat. Serenissimus R E X Ciui-
tates tueri, salutem Patriæ vltra eius fines quærere, glo-
riam, quam sibi nemo domi peperit, armis, ab hostili
solo, (quod verè Martium est) petere studuit; Emi-
nentissimus, ne lusus immanissimus ouile infestet, as-
siduâ curâ laborabat. Serenissimus R E X vt tutor Pa-
triæ limitum & seruator penatium, militem, Othomani-
co furori formidabilem, totiesq̃ue in cruore barbarico
triumphantem, ad eas Patriæ metas duxit, in quibus
sub auspicijs eius felicissimis, prodigi vitæ, & fortuna-
rum, strenui milites, à focis, laribus, penetralibus, à
suorum complexu remoti, irruentium procellam hosti-
um re-

um represserunt, furores hostiles remorati sunt, magno cum impetu decumanos fluctus ad opprimendam salutem Patriæ inuolantes, & naufragam spem portendentes, oppositu suorum laterum retardârunt; Serenissimus & Eminentissimus Cardinalis contrâ, nominis gloria, quæ plerumque inuidiæ alicuius confinio lædi solet, contemptâ, in æterna beatitudine mentem animumque collocauit. Quid enim homini magis conuenit, eumque magis exornat, & illustrat, quàm Religio, & pietas, Princeps ac Regina omnium virtutum, omnis honestatis atque dignitatis iucundissimum seminarium, omnium officiorum regula, omnium actionum moderatio, omnium denique rerum perfectio, & absolutio. Cui qui sese deuouerit, & addixerit, non ille iusiurandum violabit, non fidem nefariè prodet, non alienis fortunis manum inferet, nullamque fraudem atque pestem alteri machinabitur: non odio atque irâ immani concitabitur, nullis inuidiæ pœnis agitabitur, nullo denique animi tumultu, ac cupiditatis immoderatione, de statu mentis conuelletur: sed omnes curas atque cogitationes ad decus & honestatem conferet, & quoduis potius periculum atque discrimen adiuerit; quàm vt dignitatem & virtutem labefactari, atque contaminari sinat; imperium rationis in omnibus sequetur, & ad illud bonum parandum, atque fruendum, cuius causâ in hanc lucem editi sumus, hunc vitalem spiritum ducimus, & in quo summa ac perfecta felicitas, beatitudoque consistit, totâ mente atque pectore, assidue aspirabit. His instructum virtutibus, his munitum præsidij, Eminentissimum nostrum Episcopum,

pum, dum Roma communis omnium patria, atque omnium rectè factorum liberalissima remuneratrix intuetur, Eius memoria se oblectare, eum in ore, & sermonibus habere, & amplissimos honores illi parare cæpit. Nec diu cunctandum sibi existimauit, aut in longum gaudia eius differre voluit, sed in ipso ætatis flore, quo vix alij ex vmbra in lucem prodire, & ad publica negotia accedere solent, summum quod habuit pretium virtuti eius perfoluit, atque in Augustissimum Cardinalium ordinem, vt aliquando in Ecclesiæ cardine constitutus, posset demum, in firmam & solidam conuerti columnã in Tabernaculo Dei erigendam, cooptauit. Quo honore nihil magnificentius, aut ad nominis immortalitatem diuinius esse potest. Finge Regum aureas Principumvè coronas: finge Imperatorum laureas atque paludamenta: finge Romanorum fasces atque secures: finge geniales sponsum Myrthos ac verbenas inserta contextas: finge ludicra pugilum, & gladiatorum decora, oleastrum, apium, aliaque id genus, finge ciuicas, rostratas, nauales, murales, & quidquid decoris sua olim virtus cuique peperit: quàm vili humanæ mentis solum gaudet ornamento? Reges non ad honorem, quietem, otium, securitatem, gaudium, verùm ad curas, sollicitudines, onera, metus, pericula deliguntur, quibus sceptrum eorum, & diademata referta sunt. Hic autem fastus, hæc maiestas, & pompa, hoc satellitium, ista rerum abundantia, hæc deliciae, solutissimaque licentia, non sunt fructus solidi, sed folia duntaxat, & inania nomina, vmbrae, imagines, somnia, & compedes quamuis aureæ. An non
assiduo

assiduo in carcere Imperatores versantur, cum & ipsi
armis freti esse, & cum benè armatis custodibus habita-
re, atque in publico apparere cogantur? multi Regnis spoli-
ati, multi in seruitutem abducti. Quod si felices censendi
sunt ob togam purpuream, coronam, & sceptrum in-
signe, quare Augustus de Imperio dimittendo cogitavit,
Diocletianus dimisit, alij recusarunt? At saltem illorum
ministri beati sunt. Quomodo? quos fidelissimos & ca-
rissimos habuerunt, istis aliquando præcipuè nocue-
runt: & plerique non eos diligunt magis, qui amore di-
gniores sunt, propter virtutem, scientiam, & prudenti-
am: sed qui ad ingenia eorum aptiores, & in cupidita-
tibus ministri diligentiores. Cum ergo inconstans, &
mutabilis principum fortuna sit, Principem in coronis
tu mihi locum da, summo huic gloriæ theatro, maxi-
mo virtutis campo, amplissimo meritorum donatio,
scilicet Cardinalicio Ordini. Romanorum Senatum
quidam dixit ex Regibus constare: Ego veriùs Cardi-
nalianum confessum, Regum concilium appellauero.
Quæ enim ibi maiestas, qui splendor, quæ animi ma-
gnitudo, quæ iudicij grauitas, & consilij maturitas desi-
deratur? Cæsarum atque Regum filij hac purpura obue-
lari apprimè gloriosum sibi existimant, & cum eorum
dignitas in summo sit posita loco, tamen plurimum splē-
doris, atque decoris ex Ostro Romano sibi accedere ve-
rissimè iudicant. Etsi verò à quocunq̃ Summo Ponti-
fice tam excelsa ornari dignitate, sit sponte sua maximè
illustre atque eximium, tamen longè angustius, atque
magnificentius est, ab Urbano Octauo, sapientissimo,


Religiosissimo, atque felicissimo Pontifice, tali splendore affici, cuius in pernoscendis ingenijs acumen, in ponderandis meritis prudentiam, in remunerandis præclarè factis iustitiam, in excitandis denique ad omnem honestatem atque laudem hominum studijs, perpetuam sollicitudinem orbis vniuersus miratur, & obstupefcit. Neque de illo dici potest, quod de Cæsare Tullius, cum Cæsar, (inquit) quosdam ornare voluit, non ipsos honestauit, sed ornamenta turpauit. Ipse verò Sanctissimus Pontifex, honores virtute, titulos dignitate, loca que viris splendidiora, atque venerabiliora reddidit. Neque verò Eminentissimum Cardinalem nostrum hæc sublimis dignitas, Regiæ Maiestatis illustre auctuarium immutauit, atque nouis & tumidis opinionibus inflauit, non humeros sustulit, ceruicem crexit, nares contraxit, supercilium adduxit, imò longè modestius de se sentire, magisque comis, facilis, & humanus omnibus visus est, ita vt qui antea virtutem eius venerarentur, dignitatem colerent, nunc ostro Romano obuelatum, propter summam animi moderationem obstupefcant. Atque enim sol lucidissimus, quo densioribus circumseptus nebulis fuerit, eo pulchrius, clariusque caput exerit, suoque ingenti radiorum splendore omnes orbis plagas collustrat: ita Eminentissimus Cardinalis noster, locum inter togatos Patres Quirinalis Capitolijs fortitus, quasi lucidissimum Sydus, omnes Sarmatiæ angulos virtutum suarum radijs collustrauit, vt non immeritò fulgentissima virtutum eius ornamenta, Polonia cōspiciens, eam lætitiæ plenam vocem emisericit. Venient
annis

annis secula feris Amplissime Præsul, quando non modo
æstuantem pectoris Tui magnitudinem, verum & profu-
sam tuam munificentiam, viuacem & erga D E V Mat-
que homines ardentem, charitatis flammâ, Tuam raram
illam prudentiam officiorum, ac negotiorum momenta
grauissimè ponderantem, laborum inuictum robur, &
tolerantiam, cæteraque pectoris tui aurea ornamenta,
vberioribus ex limpidissimis Musarum fluentis, ad pe-
rennem famam efflorescentis gloriæ irrigabuntur, & ab
arce Palladiâ, cuius Tu Illustrissime honori & incremen-
to fuisti plusquam studiosus, fama perennis, æternis tu-
barum clangoribus, Iagellonicum nomen posteritatem
in omnem personabit. Sed vt nulla sincera est voluptas,
quam non aliqua contamine ægritudo, quòquo res ma-
gis nobis cara, atque iucunda est, eò magis eius amit-
tendæ metu cruciamur, cum Tui, incredibilem animi
iucunditatem, de tuis amplissimis honoribus perciperet
Polonia, illa tamen cura, eam vehementer coquebat,
atque mordebat, quòd sollicitè metueret, ne Romanæ
urbis Maiestate, sacrorum Religione, Principumque dul-
cissima consuetudine captus, atque deuinctus, ad tuos
nunquam redires. Itaq; inter lætitiâ & animi molesti-
am, inter spem, & metum in omnes partes animum ver-
sabat: vndique consilia conferebat, si qua ratione Te
ex amænissima Italia reuocaret, vt potius hic sol, suis,
quàm alienis luceret: & hic Nilus diuite & fæcundo ma-
nans alueo Polonorum agros atque terras oblimaret, at-
que irrigaret. Et audiuit tandem Eminentissimus Cardi-
nalis ardentissima suorum vota: dumque sedulæ apis na-

turam imitatus, ex diuersorum florum generibus, ex optimis legibus viridarium veluti diuinâ manu confutum in proprium nidum reportare contendit; iniqua fatorum vis in luctum Patriæ nostræ obarmata merces intercepit, ex oculis mediaque luce, prudentia & incredibili moderatione animi Principem sustulit, in ipso itinere lumen Patriæ eripuit; at hæc eò tempore in domicilio Empyreii orbis, & statione beata Solem Sarmaticum collocauit, quo ob virtutum gloriam, vitæ sanctimoniam, atque adeò singularum ac omnium rerum ornamentum, illustre quasi signum Polonis vniuersis, ad benè de Repub; sperandum videbatur esse sublatum. O nos miseros, quibus hunc tam clarum solem inuiderunt superi, O infelicem Cracouiam amisso Præsule tanto; O infelicem omnium scientiarum atque virtutum alumnam Academiam Cracouien. amisso Cancellario fauentissimo. O infelices musas amisso penè præsidio maximo. Quæso vos Equites Nobilissimi erigite animos, & Poloniam ipsam lapsantem, oculis contemplantini. me enim plura dicere non finit nunc dolor. Omnes interim tanti Principis memoriam contemplatione virtutum sanctam ducamus, quo nondum alius in Regno Poloniæ, neque priuatim neque publicè maioribus ornamentis illustrare potuit Europam, doleamus casum nostrum, quibus alienissimo tempore, atque adeò eo, cum Eminentissimo nobis Cardinali opus esset IOANNE ALBERTO carèdum est. Tu quæ ipsa vrbs largo flumine vultum ciuium tuorum humecta, qui IOANNEM ALBERTVM vidère quondam hexaphoris, aurata, & tanquam curuli sella; cæterisque Pontifi-

Pontificia Maieſtatis inſignibus coruſcantem, ijdem per
hoſce dies illum viderunt exanimem, redactum in alio-
rum mortalium ordinem, in feretro iacentem, & de
Cardinalicij celſitudine ſolij, in pædoreſ tumuli ſqua-
lentis abiectum. Hic exitus, hic occaſus eſt honorum
omnium: ad hunc ſcopum, quæcunq; admirantur ho-
mines, illiſa franguntur: in haſ tenebras, ad ſolitudinem
redigendum, quidquid in mortalium oculis eniteſcit.
continenter piè viuendi norma mors eſt: nec vitæ
ſtadium recta decurrit, qui in ſtadij metas,
non deſigit obtutum. Hæc laus, hic
apex ſapientiæ eſt, ea viuen-
tem appetere, quæ morienti
forent appetenda.

D I X I.





*Sub felicibus auspicijs Admodum Reuerendi
& Magnifici Domini,*

D. IACOBI NAYMANOWICZ,
I. V. Doctoris & Professoris, Canonici
Cracouiẽ. Archidiaconi Pileceñ.
&c. &c.

Vniuersitatis Cracouiensis
GENERALIS RECTORIS.

Cracouia, In Officina Francisci Casarij, Anno 1635.

Z,





